



Istraga u vezi sa zemljištem u sarajevskom naselju Nedžarići

Radeljaš i službenici Novog Grada "pali" zbog pljačke oko 1,3 miliona maraka

Esed Radeljaš pribavio je sebi i drugima protivpravnu imovinsku korist oko milion maraka. Ostale tri osumnjičene osobe Kapetanović, Horo i Čaušević, Radeljašu su omogućile da nezakonito stekne novac i imovinu

Po nalogu i pod nadzorom Kantonalnog tužilaštva u Sarajevu pripadnici Državne agencije za istrage i zaštitu (SIPA) uhapsili su jučer Eseda Radeljaša, te tri uposlenika Općine Novi Grad Sarajevo. Osim Radeljaša, uhapšeni su i Nedžad Kapetanović, bivši pravobranilac općine Novi Grad, Jasmina Horo, bivša pomoćnica načelnika ove općine SDP-ovca Damira Hadžića i Jusuf Čaušević, šef Odsjeka za imovinsko-pravne poslove. Oni su uhapšeni po nalogu Kantonalnog tužilaštva u Sarajevu.

Zemljište u Nedžarićima

Radeljaš, nekadašnji vijećnik u Novom Gradu, skupštinski zastupnik u KS, ministar u Bosansko-podrinjskom kantonu te član upravnih odbora i drugih tijela, uhapšen je jučer pod sumnjom za krivična djela ovjeravanje neistinitog sadržaja, podstrekavanje na zloupotrebu položaja, davanje dara i drugih oblika koristi te pranje

novca. Tačnije, osnivač Stranke za bolje Gorazde, Radeljaš, uhapšen je zbog manipulacija državnim zemljištem u sarajevskom naselju Nedžarići.

Počinjenjem ovih krivičnih djela Esed Radeljaš je pribavio sebi i drugima protivpravnu imovinsku korist oko milion maraka. Ostale tri osumnjičene osobe Radeljašu su omogućile da kroz upravni postupak nezakonito stekne novac i imovinu, naveli su jučer iz Tužilaštva. Pripadnici SIPA-e i lokalnih policija pretresli su jučer i objekte na šest lokacija s ciljem razotkrivanja i dokumentiranja krivičnih djela.

U konkretnom slučaju 2006. godine Općina Novi Grad je Radeljašu dodijelila zemljište u Nedžarićima uz naknadu od 51.340 KM. Centar za istraživačko novinarstvo (CIN) ranije je pisao da je Radeljašu zemljište dodijeljeno bez javnog poziva, što je suprotno Zakonu o građevinskom zemljištu FBiH. Saglasnost za takvo što dao je

pravobranilac Kapetanović, a postupak dodjele zemljišta vodio je Čaušević.

Zemljište je Radeljašu oduzeto 2010. godine, jer nije ispoštovao ugovorne obaveze i u predviđenom roku na njemu izgradio poslovni objekat. On je u to vrijeme bio vijećnik u Općinskom vijeću Novi Grad i od Općine je zatražio odštetu za oduzeto zemljište. Odšteta mu je odobrena u iznosu 23 puta većem od naknade koju je platio. Isplaćeno mu je 1,03 miliona KM. Čaušević je vodio i ovaj postupak, a saglasnost je dao pravobranilac Kapetanović, kojem je Radeljaš godinu poslije prodao svoju vikendicu za deset hiljada maraka na sarajevskom izletištu Bijambare. Tu je vikendicu Radeljaš kupio od sudije Kantonalnog suda u Sarajevu Vladimira Špoljarića, a koji je bio uključen u njegov sudski proces. Sudija Špoljarić je trebao ispraviti grešku napravljenu u presudi protiv Radeljaša gdje je umjesto imena Esed, upisano Esad. Iako je 2005. godine Radeljaš na Vrhovnom sudu FBiH pravosnažno osuđen za prevaru na godinu dana zatvora, zbog greške u imenu nije otišao iza rešetaka, pisao je ranije CIN.

Tužbe saradnika

Centar za istraživačko novinarstvo je u više navrata pisao, uz detaljnu dokumentaciju i argumentaciju, o Radeljaševoj nelegalno stečenoj imovini u Sarajevu,

Ustikolini i Foči. Čak su i njegovi bivši poslovni partneri protiv njega podnijeli tužbe.

Tužilac je jučer u prostorijama SIPA-e ispitao uhapšene koji će, kako je jučer saopćeno,

biti predati Tužilaštvu KS po isteku zakonskog roka od 24 sata.

R. F.

EFENDIĆ UPOZORAVAO

Zaključak Damira Hadžića

Semir Efendić, načelnik općine Novi Grad Sarajevo, također je upozoravao 2014. godine da je toj općini nanesena šteta oko milion maraka, koja je nastala u 2010. i 2011. godini.

- Fizičkom licu Esedu Radeljašu 1.033.000 KM isplaćeno je na osnovu zaključka općinskog načelnika Damira Hadžića od 2. aprila 2010. godine. Kompletne spise sa svom dokumentacijom prosljediti ćemo Odjelu za organizirani kriminal Tužilaštva BiH, neka oni procijene o čemu se radi - naveo je tada načelnik Efendić.

Zašto je uhapšen Esed Radeljaš



2006. Dodjela općinskog zemljišta



Općina Novi Grad dodijelila Esedu Radeljašu **zemljište u Nedžarićima** u Sarajevu za gradnju stambeno-poslovnog objekta. Platio naknadu **51.340 KM**. Nije izgradio objekat u predviđenom roku. Saglasnost za dodjelu dao je tadašnji općinski pravobranilac **Nedžad Kapetanović**.



2010. Milionska odšteta

Općina Novi Grad oduzela Radeljašu zemljište. Uz saglasnost Kapetanovića, isplaćena mu je odšteta od **1,03 miliona KM**. Radeljaš je u to vrijeme bio vijećnik u ovoj općini.



2011. Prodaja vikendice pravobranioocu

Kapetanović od Radeljaša kupio vikendicu za **10.000 KM**.



2016. Hapšenje

Radeljaš, Kapetanović i još dvoje općinskih službenika uhapšeni zbog zloupotrebe položaja, pranja novca i primanja dara.